

東

華

續

錄

臣王先謙敬編

臣陶濬宣恭校

秋七月甲辰朔諭內閣勞崇光奏參疏防土匪劫獄之知縣各員等語廣西恭城縣屬大眼停鑪丹皮等村匪徒糾眾屯踞膽敢分股爬城直至縣監將監犯劫出仍由原處越城逃竄並有拒傷壯丁情事似此目無法紀實屬情同叛逆該署縣高鑑等事前旣疏於防範臨時又不能實力掩捕均屬咎無可辭署恭城縣事揀發知縣高鑑署恭城縣典史試用從九品施廷槐恭城縣把總趙步瀛均著革職畱於該地方勒限協緝逃匪並被劫監犯務獲究辦限滿有無弋獲再行分別覈辦○諭勞崇光奏會匪擁入縣城直撲省垣旋經克復擊退各一摺廣西興安縣屬馬坪村匪徒聚眾

拜會經該縣知縣蔡映符前往查拏輒敢糾約夥黨闖入縣城戕官奪犯復竄入靈川縣城盤踞經該撫先派臬司許祥光候補知府張其翰馳往勦辦該匪膽敢擁眾出城開礮抗拒許祥光督飭兵勇三面夾攻約斃賊匪一千餘名生擒一百三十五名卽將縣城克復其分股屯紮海洋坪之匪猶敢自熊村一帶直撲桂林省垣經遊擊福格右江道張敬修水陸進勦通計殺斃燒斃賊匪約二千名生擒六十餘名餘匪翻山四竄省城內外均極安謐此股會匪倉卒肆擾連入二城分竄數處狂悖已極見在靈川縣城業已克復桂林撲城之匪亦已擊退卽著乘勝追勦迅速撲滅毋任蔓延巡撫勞崇光提督惠慶於縣城失事未能先事豫防均著交部議處靈川縣知縣聯凱防守未能周密致令賊匪闖入咎無可辭姑念其隨同臬司收城出力著卽革職免其治罪仍責令帶兵

追勦以觀後效候補知府張其翰先抵靈川雖因賊眾兵單致令
縣城失事究係救援不力著交部議處其興安縣知縣蔡映符及
同城文武著該撫迅速查明具奏○諭軍機大臣等昨以懷慶被
圍緊急復降諭旨令訥爾經額等迅籌進剿本日據恩華奏懷慶
府知府余炳壽等遣人鉤城稟報該郡城被地雷轟擊三次雖經
搶護得完而城內糧食僅敷數日民壯萬人嬰城固守勢甚危急
等語覽奏彌深焦灼賊營逼近城垣四圍周匝知我大軍踵至勢
必併力急攻希冀入城踞爲巢穴此時惟有速飭各路官兵合力
進剿速解郡城之圍萬不可稍有延緩據稱二十七日會齊進剿
諒已捷報在途矣行軍期約最關緊要稍有參差便恐誤事儻機
事不密爲賊暗防或意見不同致失期會皆於大局甚有關繫該
大臣等統領諸軍同心合力密籌速辦務將懷慶一股賊匪立即

殲擒淨盡肅清河北惟諸臣之功若遷延時日郡城或有疏虞以致震驚畿輔諸大臣等自問當得何罪訥爾經額等同辦一事尤貴以大局爲要和衷乃克有濟豫省軍營距京甚近朕無難隨時訪聞況訥爾經額身受皇考及朕簡畀深恩亦應涕零感激以圖報稱能慰朕盼捷之心卽是安列聖在天之靈此時機宜萬不可失據懷慶府縣所稟賊匪至多不過四五千人南門之賊較少西門更少該逆所豎各色旗幟亦難保非虛張聲勢以疑我兵總須確實偵探迅速攻剿軍情變幻旦夕不同惟在諸臣相機速辦和衷共濟朕亦不爲遙制也至恩華所帶大半皆直隸弁兵一切糧餉自應歸直隸辦理著該大臣卽飭知張集馨等妥速籌辦訥爾經額前請由河南糧臺支應恐該省勢難兼顧轉致貽誤本日已諭知哈芬於山西省籌畫協濟該大臣等卽咨行商辦可也

將此由六百里各諭令知之○諭琦善陳金綬雷以誠奏三汊河擊賊獲勝並浦口擊退賊船各摺片瓜州賊匪進占虹橋復敢率帶賊黨直撲三汊河營盤經遊擊安勇黃志配都司毛三元侍衛德興阿等分路進攻嗣復合兵會剿大獲勝仗浦口賊船亦經武慶開隆阿西昌阿伊興額等迎剿斬獲甚多惟瓜州之賊與鎮江聯作一氣並據奸細及所獲僞總帥各供有添集賊黨來揚接應並由北岸竄擾之說急宜嚴防北竄乘勝進取該大臣續派瞿騰龍赴三汊河協勦復派薩炳阿馳往儀徵修築港灞收集船隻木簰陸路施家橋派有張翊國駐守布置似尚周妥惟防守固不可不嚴而進攻尤不可不力諄諄降旨令該大臣等迅速勦辦並批令於季夏以前將揚城克復朕焦勞宵旰渴盼捷音乃瞬屆月餘雖獲有勝仗而克復仍無把握該大臣等清夜捫心能無自愧前

有旨諭令將慧成容照所帶官兵截留以備調撥想琦善等已遵照布置矣將此由六百里各諭令知之○諭前據駱秉章奏廣西興安恭城均有土匪闖入縣城已降旨令勞崇光迅速兜拏並令將見辦土匪情形詳晰具奏本日據該撫奏到五月二十八月初七先後拜發各摺件朕詳加披閱如興安一省攻陷縣城後卽竄擾靈川直撲省城雖經該省兵勇先後勦殺將靈川立時收復並擊退撲城賊匪而長岡嶺海洋坪屯紮之賊均尚未散其界首唐家市嚴關靈田墟等處或直達全州或環近興安該匪等尙在盤踞襄脅勞崇光所派臬司許祥光等馳抵靈川卽遇賊接仗並未直擣賊巢若因兵力不及任令日久黨多勦辦愈難得手昨駱秉章摺內有該匪於五月二十八日竄擾全州之語該撫所奏並未敘及難保該匪不以分股嘗試省垣而暗襲全州窺伺楚省著

卽迅速查明分路兜勦廣東額兵徵調已多本日據葉名琛奏已撥兵五百名由肇慶一帶前往兜勦此項官兵係泝流而上到省恐須時日該撫卽一面飛催一面先就本省兵勇趕緊籌勦務當埽除淨盡不可稍畱遺孽另片奏有謝開八一股竄擾遷江縣城刻卽收復等語該省伏莽未清見雖餉紺兵單辦理不易總當隨時隨地相機籌辦能撲滅一股卽少一方之擾害勞崇光熟悉廣西情形平日辦事尙稱認真諒不至束手無策也所需銀兩據葉名琛奏廣東籌撥十三萬餘兩已諭令迅速起解矣將此由六百里諭令知之○諭前降旨令哈芬督飭鎮將防賊西竄太行扼要截擊茲據奏催令總兵烏勒欣泰遊擊和昌等共帶兵二千名已於六月二十日出太行山隘口紮營進勦該撫已行抵祁縣因防堵兵單擬赴澤州在太行山前駐紮以扼北竄之路惟該總兵所

帶之兵齊赴懷慶後路有無接應不可不加意布置直隸兵丁需
餉孔亟該撫仍須兼顧先籌接濟所有前調陝西兵二千餘名由
蒲州取道計已馳入晉境著卽催令前進以扼太行要隘兼可爲
懷慶接應毋稍延緩另片奏查拏軍營逃回之兵擬卽就地正法
此項兵丁未經打仗輒自逃回其情誠屬可惡著該撫於拏到時
訊明何人起意擇其尤者卽行正法以肅軍令將此由六百里諭
令知之○琦善奏揚城四面重濠急切未能克復得旨止言其難
豈不籌破難之法耶○乙巳諭內閣御史張灋翰奏守土印官開
城逃走一摺前因河南歸德府城失守降旨令陸應穀將城內文
武員弁確查參奏茲據該御史奏稱署商邱縣知縣宋錫慶因賊
氛漸近豫將眷屬送回原籍迨守禦喫緊之際輒擅將北門關鎖
打斷開城逃去以致逆匪乘機進城肆行荼毒等語知縣爲守土

之官理應與紳士人等合力同心嬰城固守若如所奏貪生無恥
貌法已極著陸應穀迅速派員將該署縣宋錫慶查拏嚴訊如有
開城逃避情事卽將該員按律處斬以昭炯戒其餘各文武員弁
仍著迅速查明具奏新授歸德府知府王之斌並部選該府文武
各員著該部飭令迅卽赴任毋稍遲延○諭軍機大臣等桂良奏
相度全省形勢分兵布置一摺據稱河北形勢以清化鎮臨洺關
爲最要該處均有大軍駐紮正定府勢居後勁離省城較近且與
山西接壤地方甚多急應籌防見據訥爾經額咨稱將所調山西
大同鎮三四起官兵一千名截留正定其五六起官兵一千名畱
於保定如不敷調遣卽酌調駐紮天津之盛京步隊數百名等語
布置尙屬周妥卽著照議辦理保定省城爲畿輔重地該尙書務
卽督率文武實力巡防並派委員弁嚴密訪拏奸細不可稍有疏

懈亦不可過涉張皇將此由四百里諭令知之○山東布政使崇恩奏報到任謝恩得旨汝此次復履舊任務須振刷精神不准稍圖安逸從前在 皇考時疊經獲罪今朕復棄瑕錄用冀汝整飭圖新並非欲翻舊案也辦事要認真度量要寬洪然亦甚難朕看汝非真能放得寬舍得脫者一切舊勢舊怨止可付之東洋若時存芥蒂不但有誤地方於汝身亦甚無益尤不可有意沽名自誤誤人誠非淺鮮汝雖至愚亦斷不肯以自己身家博眾人之譽也時加儆惕勉之懷之○命前任山東布政使劉源灝仍畱山東督辦團練○丙午諭軍機大臣等前因鎮江虹橋等處接仗失利諭令慧成等帶兵折回扼要布置茲據奏稱已抵濟城料理一切候旨啟行並知會容照帶兵先回清江聽候調度等語懷慶賊匪見經各路重兵趕到會合兜剿慧成尙在濟城即使前往懷慶亦需

時日見在揚州後路空虛琦善等奏報亦以兵力未數爲慮著慧成仍遵前旨督帶官兵迅卽折回清江浦與琦善等咨商扼要攻勦儻賊北竄並可就近策應毋稍遲延將此由六百里諭令知之○吳鍾駿以病免以李維翰爲禮部左侍郎由宗人府丞遷○丁未諭內閣聯順奏揀選營員請酌定章程一摺向來保送營員均以弓馬嫻熟爲憑若如該侍郎所奏派充揀選時見有步射不到靶者數十員似此技藝生疏該旗營何以輒行保送恐該員等有取巧規避情弊嗣後保送營員著該王大臣等遵照定例秉公保送至派出揀選之大臣亦當認真校閱如有弓馬生疏技藝過劣者該大臣卽行指名參處以重考校而杜規避○諭聯順奏請稽查海淀地面等語見當辦理巡防之時各城內外俱經按段巡查海淀密邇園庭尤宜嚴肅茲據聯順奏稱圓明園營汛更號燈火未能

整齊城防稽查於鋪戶民居亦有疏漏著步軍統領衙門並巡視
西北二城御史遵照前旨嚴飭營防各員認真稽查無論客店廟
宇及鋪戶民居均當隨時查對門牌俾奸宄無從溷迹地方日就
肅清毋得視為具文稍形疏懈○諭軍機大臣等本日據訥爾經
額托明阿及勝保各具奏連日獲勝情形朕詳加披覽賊勢已漸
窮蹙府城當可解圍惟連日進仗皆係托明阿勝保善祿所帶官
兵其攻破賊營及勦殺賊匪皆在遼東一面該處賊匪固較西北
兩面為多而但由一路進兵並未四面合勦前次烏蘭都董占元
所獲勝仗皆近在丹河南北中間尚隔沁河未能直逼賊壘懷慶
孤城究乏切近援應此時托明阿勝保善祿等已破賊營兩座斬
獲甚眾而各路營盤或踞城十餘里遠者至三十里仍屬鞭長莫
及援兵雖眾尙未能與城內聲息相通仍不足恃著訥爾經額卽

飭所派董占元花里雅遜布等與恩華李德迅卽移營前進合力
攻剿總以速渡沁河緊逼賊壘爲力解重圍之計其南通孟縣西
通濟源之路均關緊要哈芬所派烏勒欣泰管帶之兵聞已出太
行山口但恐該省官兵仍形單弱勝保所請分兵駐紮崇義鎮自
係扼要妥籌著該大臣等卽行酌量分撥以爲聲援儻進剿之兵
一時不敷調遣其見駐臨洺關及該大臣隨營之兵均可移遠就
近前路多一得力之兵卽後路可省一分防堵之力董占元前此
進仗雖有斬獲輒以礮熱收隊連日以來並未見其接仗花里雅
遜布見署河北鎮責無旁貸何以亦未奮力進攻均不可解朕聞
各路官兵卽素稱勁旅者亦不過於距賊一百步外以槍礮轟擊
不敢前衝如此槍礮安得不熱弓箭刀矛復成何用勁旅若此其
他可知吉林官兵素習鳥槍頗稱得力著恩華卽行前進若能與

勝保合隊甚好若勢難併隊亦可照勝保所請酌選五百名迅交
勝保統帶與綠營步隊相輔進剿仍當與勝保營壘相接互爲應
援若繁營太遠不能聯絡則吉林兵五百分出曷若仍在一處較
善也本日已明降諭旨令勝保幫辦河北軍務各路官兵均可酌
量調遣軍情旦夕不同總宜隨時相機辦理毋稍拘泥延誤懷慶
被圍危急儻救援稍緩致有疏失朕惟後至者是問決不寬貸將
此由六百里加緊各諭令知之○諭雷以誠奏東路布置情形並
請添兵一摺揚州東路自虹橋失利後瓜州之匪與揚城聲勢相
聯儻乘間東竄不惟仙女廟難以抵禦下河州縣及淮安清河均
在在可危該侍郎查明施家橋爲瓜揚通行之路會商琦善派令
張翊國帶勇數百名在橋北之褚家壩繁營以防賊匪由陸路東
竄其通瓜州江口之錢家灣常家馬頭李墅河嚴家橋等處亦俱

分撥協防布置尙屬周妥惟瓜揚協剿兵力不敷前已疊降諭旨
令琦善等將慧成容照所帶官兵截畱以備調撥昨據慧成奏行
抵濟城仍諭令折回清江著琦善飛催慧成並容照所帶各兵酌
量布置以資防剿該侍郎軍營與福濟相距不遠正可互爲聲援
俟懷慶賊匪悉數殲除當再撥兵赴瓜揚一帶協剿也至琦善大
營糧餉向由鄭敦謹糧臺支應該侍郎所需糧餉著一件由鄭敦
謹接濟母庸由陳啟邁支付以歸畫一將此由六百里各諭令知
之○以勦懷慶賊獲勝命內閣學士勝保幫辦河南軍務○戊申
諭內閣御史方俊奏統兵大員誤國殃民請旨撤銷卹典一摺已
故兩江總督陸建瀛前因喪師失律降旨革職拏問查鈔嗣經怡
良查明該督於城破時遇賊被害尙非忍辱偷生是以仍加恩卹
茲據該御史奏稱該督自九江逃回關繫天下大局祥厚霍隆武

之死慘烈可矜江安數百萬生靈遭茲荼毒皆由陸建瀛一人所致請撤銷卹典等語所奏自屬公論陸建瀛業經賞還總督銜復將原鈔家產給還已足示朕法外施仁之意著毋庸另議卹典以昭區別○諭軍機大臣等琦善陳金綬雷以誠奏賊匪四出衝突官兵分剿獲勝並浦口焚毀逆船殲擒賊匪各摺片揚城賊匪於六月二十七八九等日由東關便益兩門及徐凝等門分路衝突經官兵分隊擊敗斬獲甚多其西門南門擁出及城上縋下之賊亦經官兵擊退浦口逆船經武慶開隆阿等燒毀多隻奪獲軍械多件是賊勢漸就窮蹙急思奔突必應嚴扼要隘以防其乘閒逃逸據稱瓜州賊匪有至三汊河報復之說恐揚城之賊突出夾攻特飭瞿騰龍帶領弁兵馳赴南門外防守並由三汊河繞至南門東岸嚴密巡查自應如此布置惟避實襲虛是賊慣技著琦善陳

金綬會同雷以誠福濟等妥籌協勦合力進攻務將揚城之賊悉數殲除斷不可再令竄出復滋蔓延慧成容照所帶官兵計可先後趕到著卽隨時擇要調撥俾得互相策應切勿以有用之兵置之無用之地其浦口逆船仍飭令開隆阿武慶西昌阿伊興額等迅速進剿以期江路肅清毋再延緩將此由六百里各諭令知之

○己酉諭內閣勞崇光奏攻勦恭城縣匪徒大獲全勝一摺據稱匪徒陳亞求黃安兆糾夥劫獄竄赴恭城秧家街牛尾洞龍虎關等處分起屯踞該撫飭催藍翎候補守備萬明魁等統帶團練兵勇分路進攻該逆竄入街內兵勇乘勢逼入生擒首匪陳亞求黃安兆二名夥匪黎正升等一百九十二名割取首級二百零五顆餘匪竄往湖南永明一帶復經兵勇圍練追殺二三十名跌斃十餘名並經湖南弁兵殲斃多名又分飭兵勇圍練入山搜捕餘匪

等語該匪陳亞求等因行劫夥犯被拏輒敢勾結匪眾入城劫獄抗拒官兵不法已極經該撫派員將大股匪黨殲擒殆盡洵足彰國法而快人心候補守備萬明魁前經該撫派赴昭平一帶將積年逋寇捕獲多名此次勦辦恭城匪徒尤能奮勉出力萬明魁著以守備遇缺儘先卽補賞加都司銜並賞換花翎其餘在事出力員弁兵勇紳團人等均著查明覈實保奏候朕施恩毋許冒濫至此案首匪雖已就擒而被劫各犯尙未弋獲是否業經殲斃抑或乘間潛逃著卽確切查明嚴拏務獲毋任漏網○諭勞崇光奏進勦興安逆匪大獲全勝克復縣城生擒首犯一摺據稱臬司許祥光馳抵興安親督文武員弁攻進縣城該匪往南鄉一帶逃竄沿途追殺多名內有匪首王狗晚等八名並糾眾攻撲省城首犯僞元帥石生芒一名其東路逆匪分踞長岡嶺海洋坪經右江道張

敬修統帶兵勇殲斃一百餘名生擒二十七名內有首匪秦倡裕
一名並生擒僞元帥廖老九僞副元帥蔣方漋及匪夥十五人攻
撲全州之匪經署守備王岷山選帶弁兵出城奮力攻擊斃賊一
百餘名生擒首匪蒋得志及夥匪一百二十餘名見在全州已無
大股賊匪等語廣西興安會匪連陷興安靈川兩縣又分股攻撲
全州並敢直撲省城狂悖已極經該撫派令許祥光等分路進攻
屢獲全勝該員等親歷行間身先士卒實屬勇敢可嘉許祥光著
賞加布政使銜張敬修著賞加按察使銜其餘在事出力員弁兵
勇及紳團人等均著查明具實保奏候朕施恩毋許冒濫○諭駱
秉章奏會剿土匪事竣一摺據稱江西上猶龍泉等縣土匪竄擾
湖南之桂東永興等縣該撫派委候補府經歷孫第培候選縣丞
王鑫等馳抵竹院地方督率紳士團勇分路進攻賊眾奔避眾勇

合力前進斃賊四百餘名墜崖溺水者不計其數並將分水坳洞頭石角圍等處匪巢盡行平毀等語上猶等縣匪徒竄入桂東戕官拒捕擾及永興等縣經該撫派員深入江西境地將鷺形等處巢穴悉數埽除辦理尚屬迅速所有在事出力之文武員弁及紳士兵勇人等著駱秉章查明覈實保奏候朕施恩○諭軍機大臣等據張芾奏逆匪上竄時不過數千人向繼雄旣以無援而敗福興又復縱賊不追賊遂沿途裹脅勢益披猖等語已革提督福興經該大臣派往追賊何以行至蕪湖遠爾返櫂不與向繼雄夾擊著向榮確切查明據寶具奏該處糧臺已撤歸大營歸彭玉雯總理江西鹽法道熊義著卽飭令速回江西本任無稍延緩將此由六百里諭令知之○署湖廣總督張亮基奏查逆賊分股竄擾河南之新鄭許州一帶土匪捻匪處處勾結有取道西平直逼信陽

州之謠該處爲楚豫衝途信陽有警則湖北之隨州應山孝感一
帶處處宜防而應山之黃土平靖武勝三關爲自古南北有事必
爭之地所謂義陽三關也臣已札調官兵一千七百餘名交前湖
北藩司唐樹義統領馳赴該處扼堵委知縣許賡藻主事胡大任
隨同前往勸諭各處紳團互相聯絡彼此策應以輔兵力之不足
又襄陽北控宛洛南蔽江淮形勢衝要臣稔知署臬司羅遵殿前
在安襄鄖荆道任內甚有惠政卽委該署司帶印馳赴襄陽號召
鄉團勉以忠義所有提標將弁兵丁俱由該署司調遣以備不虞
上諭張亮基奏籌辦楚豫交界情形一摺布置尙屬周妥惟豫
省大兵均在河北其黃河以南兵力實形單弱見在各處匪徒竊
發儻與逆黨勾結更恐滋蔓難圖該署督務當嚴飭交界防堵各
員越境迎勦與豫省在事文武不分畛域合力夾擊以期剋日殄

滅萬勿自固藩籬徒事株守致誤事機如楚北兵勇有可分撥豫省之處卽著迅派馳往協勦將此由六百里諭令知之○江西巡撫張芾奏賊受創後未敢大隊攻城惟藏匿屋內鑿孔施放槍礮仍以零股四出窺探臬司江忠源督飭員弁開放大礮擊毀賊壘數處又於城內開挖暗濠以杜地道見在總兵馬濟美趕到卽帶兵督同參將羅玉斌等與新募川勇紮營城東北永和門外又有都司戴文蘭等分別帶勇紮營仍候兵力稍集設法進攻惟該逆被勦他竄我軍若無舟楫不能追擊必須下游戰船潮流而上方可夾攻此次向榮派已革提督福興等追賊該革員豈不知向繼雄礮船失事乃行至蕪湖遂卽返棹其實賊匪多未上岸自係乘風直下且瀕江殘破之餘已無可掠福興率稟向榮以難民船隻粉飾入奏以致賊愈蔓延言之殊堪憤恨又奏六月十一日戴文

蘭等下城禁營該逆突出數百人冒死來撲經該員等督飭兵勇擊斃賊數十名十二日戴文蘭等正在支搭帳房該逆又來一千人分作五路直撲營盤當經戴文蘭督帶開化勇前赴迎擊張金甲督帶辰州兵設伏於短牆下開化勇佯退誘敵辰州兵突出衝截開化勇復從旁環擊斃賊百餘名十四日臣派馬濟美統兵由東而北戴文蘭由西而北在得勝門外北面空心礮臺後駐紮俱於十五日卯刻出隊馬濟美督同參將羅玉斌等由東路進攻城北賊營該逆數千人蠭擁迎拒廣勇首先衝鋒川勇與鎮標兵繼之三面環擊鏖戰兩時斃賊無數其派在空心礮臺策應之廣勇練勇人數較少甫經排隊該逆數百人徑來攻撲廣勇頭目陳智泉奮勇向前抵禦練勇幫同接應空心礮臺內亦同時開礮相護賊眾始退臣與臣陳孚恩督同江忠源司道等一同在城上照

科並令知府耆齡遊擊祥麟及各弁兵開放大礮斃賊多名戴文
蘭等由西路進攻城西賊營賊匪突出三百餘人經官兵擊敗臨
匱不出惟該逆萬餘脅從雖多死黨亦復不少雖經官兵擊敗臨
陣並不潰散見在張亮基所撥兵勇已到向榮派總兵音德布帶
兵一千二百名駱秉章派兵六百名贛州總兵阿隆阿帶兵三百
餘名均陸續來到臣等擬於永和章江兩門繁營爲左右二翼東
南四門距賊稍遠防守較易 上諭賊匪零股窺探省垣經江忠
源督飭員弁開放大礮擊毀賊壘數處復於城內開空暗濠以防
地道辦理甚合機宜又經總兵馬濟美都司戴文蘭等兩路夾攻
斃賊三百餘名應已大挫兇鋒見議於永和章江門外繁營爲左
右二翼逼近賊營著卽趕緊設法勦辦東南四門雖距賊稍遠防
守較易仍當督率文武員弁不可稍存大意致有疏虞該逆裹脅

雖多一經出示解散卽有汪安樞等赴城下投誠哀憇可見被脅之人並非甘心從逆惟有設法曉諭使之自拔來歸既可絕逆匪之黨援並可探賊營之虛實至江西攻城之賊是否係金陵逆首分股遣來其頭目果係何人亟獲奸細時詳細訊供具奏將此由六百里諭知張芾並陳孚恩江忠源知之○河南巡撫陸應穀奏據署正陽縣知縣周玉贊稟捻匪千餘人攻圍縣城並疊據探報大股捻匪千餘人屯聚確山交界老君山永城自歸德失守後捻匪乘機滋擾不下二千餘人署桐柏縣知縣潘澍霖帶勇赴鄉捕拏捻匪致被戕害據陳州府知府朱師濂稟稱捻首劉元吉等一股由鹿邑竄至沈項交界之槐店當飭淮甯縣選帶兵勇會同沈邱項城官弁勦捕該匪又竄至皖境盤踞請調兵往拏等語查沈項捻匪尙無攻城結寨情形較汝甯猶可稍緩不能不先其所急

將汝甯捻匪殲滅仰懇飭副都統托雲保統帶吉林官兵馳赴歸德防剿並懇將臣前請飭調之兵四千名迅速來豫痛加剿洗上諭粵匪南竄逼近汝甯若與捻匪勾結更將滋蔓難圖自應先其所急柏山屢次剿賊尙屬勇敢著卽飭令統帶弁兵趕緊追賊先將此股粵匪盡行殄滅卽飭令統帶大兵剿辦捻匪總期一律淨盡勿畱餘孽經文岱王家琳見在何處剿賊著卽飭令合力進攻毋稍延誤托雲保所帶之兵著准其截畱吉林官兵素稱勁旅但令聚集一處調度得人必能制勝萬不可分撥各處堵守轉形單弱至請調兵四千見在河北正當會剿喫緊之際斷難分撥本日已諭令張亮基等酌撥兵勇協剿並令不分畛域派兵迎擊儻兵力仍有不敷著仍遵前旨卽咨商舒興阿於所帶防兵內酌量分撥該撫仍飭帶兵各員跟蹤追剿總期一鼓蕩平切勿以逐出

豫境爲了事也將此由六百里諭令知之○庚戌諭軍機大臣等
寄諭兩廣總督葉名琛等有人奏廣東高廉南雄一帶巨盜熾橫
羣匪之拜會結黨者所在皆然省城北門外白雲山夜間時見列
炬星羅以拜墳爲名實皆無賴之徒乘間聚集一旦竊發良可深
慮等語廣東各處土匪雖經屢次勦辦而餘匪仍復肆行其拜會
結黨盜匪萌孽尤宜設法翦除以防滋蔓著該督撫嚴飭各地方
官隨時認真查緝並密派勤幹員弁分投查訪迅速掩捕以靖地
方毋稍疏懈將此由五百里諭令知之○諭據御史黃經奏稱賊
船占踞江面必須上游速備船隻酌撥將弁統帶乘風順流東下
直抵金陵向榮陸攻東南舟師攻其西北知會下游艇船合力兜
圍等語賊匪占踞長江來往自由總因我兵不能於江面攻擊致
令蔓延該御史所奏自係目前緊要機宜勢難暫緩著張亮基崇

綸駱秉章等卽於各路水師船隻酌量調撥或設法雇僕民船多隻配帶礮位揀派得力將弁管駕自上游駛赴金陵與陸路官兵合力攻剿並與下游艇船兩路合剿方可肅清江面埽盡賊蹤所需經費較鉅此時甚難籌畫該省無論何款儘可先其所急暫行動用仍當飭部另籌歸款或有紳民團練人等情願雇備船礮隨同剿賊者該督撫等隨時保奏獎勵此係切要急務慎勿因辦理爲難稍存諉卸也原摺鈔給閱看將此由六百里各諭令知之○
諭據河南學政張之萬奏賊匪初竄豫境不過數千疊被各處兵勇勦戮夥黨漸少見在懷慶之賊窮蹙日甚請飭帶兵大員迅速進剿復據李德奏懷慶被圍日久非厚集勁兵難以破賊巢穴請飭直隸撥兵三四千名迅往協助各等語逆匪屢受懲創兇鋒大挫惟懷慶被圍已久勢甚危急而各路援兵紮營遠近不一聲勢

未能聯絡疊經降旨諭令督飭諸軍迅速合勦本日據該大臣奏
報已函屬恩華托明阿勝保李德定期四路齊進以期速解懷慶
之圍必應如此辦理惟該大臣駐紮衛輝距各路軍營較遠尙恐
咨稟稽延仍有鞭長莫及之勢著卽相機前進就近督勦李德所
請張集馨楊需所帶之兵及山西官兵並著酌量緩急以資策應
除懷慶之賊匪始可固直隸之藩籬該大臣量能仰體朕意也訥
爾經額以大學士督師勦賊以大體時勢料之斷難任賊猖狂滅
賊惟汝之功肆賊卽汝之罪卿豈不知耶將此由六百里各諭令
知之○予河南陣亡參領趙炳秀等祭葬世職○辛亥諭軍機大
臣等昨有旨將托雲保所帶官兵准令陸應穀截畱以備堵勦河
南賊匪茲據托雲保奏稱見已渡黃於本月初三日行抵延津縣
卽日督兵前赴懷慶協勦等語此項官兵卽著畱於河北軍營交

訥爾經額相機布置此時恩華諒已移營前進與勝保會合一處
前據勝保奏請撥吉林馬隊見旣添此勁旅正當乘兵力厚集之
時迅速圍攻殲除餘孽毋得遷延觀望致誤事機並著該大臣等
恩華並諭托雲保知之○王子琦善等奏近日連獲奸細僉供瓜
州賊匪欲糾鎮江之賊前來接應當經分飭鎮將晝夜嚴防七月
初一日果有賊船數百隻由瓜州駛入運河直抵三汊河爲河內
木椿所阻都司毛三元等施放大礮賊船退卻賊眾復役眾挑土
起築礮臺用大礮向北轟擊該處另有河汊係往儀徵水路該匪
沿河西行約五里許盡行登岸約有七千餘人搭橋結筏分股渡
河我兵用槍礮擊斃無算賊猶抵死搶渡適侍衛德興阿縱馬前
擊賊始少卻俄頃復進翟騰龍會同德興阿督率滿漢將領奮勇

迎敵參領博奇海全首先射斃賊匪多名遊擊安勇都司鄧鳳林
余兆吉均各督兵力戰賊去復來者五次官兵酣戰竟日冒雨攻
撲賊不能支紛紛敗退是日有另股賊匪由瓜州至洞清鋪河邊
搭橋索筏德興阿卽派參領富明阿富汗勒布馳往副將松齡錫綸
亦派都司吳車龍等帶兵截擊富明阿富汗殺賊數十名以力戰受傷
吳車龍殲斃賊匪多名其時三汊河東桂花莊有賊在彼牽牛煮
飯臣雷以誠派張翊國張得龍等馳至該處擊斃多名見在各門
均已臣有兵扼守惟鈔關徐凝二門稍覺空虛由臣雷以誠會同臣
福濟派員巡查初三日臣雷以誠復派同知吳雲等率勇二百名
至徐凝門堵勦施放火箭焚城內板屋數間賊匪縋城而下由浮
橋渡至運河東岸該員等督勇迎擊賊始退入城內臣等惟有合

八日浦口寶塔根有賊匪大船二隻小船四隻駛來傍岸武慶卽率領遊擊王巨孝督帶官兵駛往該處迎頭堵截用火箭槍礮將賊船全行燒燬臣琦善見仍分飭武慶開隆阿西昌阿伊興額等督兵實力防禦一遇賊船傍岸立即會合攻擊上諭軍機大臣等揚城瓜州之賊以三汊河爲通津要路我兵扼守斷其往來今旣盡獲勝仗是賊匪已大受懲創惟江潮方長難保不糾眾復來冒死衝突且金陵賊船亦有接濟揚州之說尤不可不嚴加防禦著琦善陳金綬會同雷以誠福濟等分飭鎮將乘勝夾攻其黑龍江及河州湖南得力之兵尤須調度得宜總期迅復揚城則鎮江金陵亦可以次克復惟進攻不可稍懈分竄尤宜嚴防鈔關徐凝二門旣稍覺空虛卽於各營官兵內酌量調撥互爲聲援總宜四面環攻令賊匪無路可竄方可聚而殲旃至浦口賊船經武慶等

擊退尤應時加防範萬不可稍有疏失致賊又竄江北諒該大臣等必能妥籌全局迅殲醜類以慰朕望也將此由六百里各諭令知之○諭陸應穀奏官兵追勦賊黨竄入楚境及折回省城布置情形並拏獲逆書等語逆賊自攻撲懷慶後其零股餘賊由汝甯一帶轉竄而南朕早知其必趨楚境茲據陸應穀奏該逆由羅山縣屬之宣化鎮渡河竄入楚境總兵王家琳已跟蹤往勦此股零匪雖已無多但恐沿途裹脅又成滋蔓不得以已入楚境遂置之不問此時柏山已赴桐柏經文岱與伊里綱阿又赴正陽僅委王家琳一員追勦實難保其必能得力該撫折回省城意以撫匪爲重歸德陳州等處偏近省垣布置誠不容緩而南路遺孽仍須速派幹員與湖北所派帶兵大員會合兜剿以淨根株至潁州捻匪本日已諭周天爵李嘉端迅速撲滅使不得與豫匪勾結該撫卽

當妥爲籌畫派兵前往歸德等處迅圖勦辦至前調各路精兵盡往河北該省南路誠慮兵單如攻勦實有不敷卽遵前旨咨商舒興阿酌量撥兵協濟可也將此由六百里諭令知之○諭本日據陸應穀奏河南零股賊匪竄入楚境一摺前據張亮基奏稱已調官兵一千七百名交唐樹義馳赴三關等處扼要堵截又委羅遵殿督帶兵勇馳赴襄陽防堵著該署督卽飭各該員等相機迎擊勿畱餘孽至潁州大股捻匪聚有數千之多皖省兵力甚單他省難於協濟惟周天爵固鎮行營有山東兵一千餘名又截畱漢中陝州兵見在宿州駐紮者一千名又撥交徐州鎮道之山西大同兵一千名奕經所帶密雲兵四百餘名均堪就近調撥著周天爵酌量情形除畱守糧臺外將該處存兵派往潁州勦除捻匪減紓青所募練勇並可令帶往協剿並著李嘉端嚴飭道府各員督率

得力兵勇與周天爵所派兵勇會合兜擊以期及早撲滅周天爵所派兵勇尤當迅速啟行庶不至匪黨勾結滋蔓難圖將此由六百里各諭令知之○琦善等奏甘肅肅州鎮總兵官武慶擊退浦口賊船情形得旨武慶在浦口防堵甚嚴伊已年逾七十猶能如是奮勇深堪嘉尚著傳諭該鎮知之○癸丑諭內閣勝保奏連日續獲勝仗見仍設法進剿一摺據稱於七月初三日約會托明阿善祿等攻賊東面李德董占元攻賊北面勝保親督兵勇直撲南門賊營該逆分三股由賊營後鈔來我兵奮勇爭先槍礮刀矛並進立斃賊匪三百餘名該逆敗退匿入木城兵勇隨剿隨進城上川勇及天津兵丁亦縋城而下直撲賊營後面該逆登時大亂兵勇奮力撲入匪眾分股抗拒經天津正定固原將弁與川勇頭目麤玉等擊斃賊七百餘名該逆乘馬頭目八十餘人由南面奔來

欲鈔我兵後路復經天津遊擊吳燦及黑龍江馬隊烏凌額魁福等槍箭齊施立將賊目盡行殲斃生擒十四名此次賊匪大受懲創勢已窮蹙著勝保卽會同各路統兵大員迅速進攻務將懷慶城外賊匪悉數殲除無令乘閒竄逸○勝保奏臣兵僅一千六百名不能分防要隘有西安副都統雙成統帶馬隊官兵五百名到懷臣因托明阿等兵力較厚與之會商酌撥涼州步隊官兵六百五十名會同馬隊官兵移紮府城南沙岡一帶既可斷其接濟之路兼可防其竄逸近日各路官兵雖厚而實在與賊接仗者不多卽如北路距賊甚遠進戰時隔河施放槍礮賊亦不甚介意西路見在無兵托明阿等東路尙能爲臣應援而其官兵亦多不能前進臣自恨兵力單薄出隊之兵僅七百餘名不能分路出奇夾攻制勝各路之兵雖多皆有統帶大員事權不一未能和衷共濟

上諭軍機大臣等逆匪竄圍懷慶而月以來各路官兵雖有斬獲而賊巢未破城圍未解該大臣等所擬布置尙屬周妥均著照議辦理惟軍情緩急仍須隨時酌度不可以有用之兵置之無用之地至勝保所陳兵力單薄不能分路出奇自係實在情形副都統雙成帶領馬隊五百名業經至勝保軍營分撥駐紮其防守柳園口之遊擊吳璋帶兵三百名並著訥爾經額飭令迅赴勝保軍營俾資攻剿仍另派弁兵前往柳園口接替見在各路兵力不爲不厚恩華李德及董占元等駐紮北路去賊尚遠若止隔河施放槍礮徒糜火藥何能有濟見聞懷慶北面賊營林立著恩華等拔營前進逼近賊巢方能與托明阿勝保等分路夾攻聯爲一氣見在勝保兵力甚單距賊甚近恩華所帶官兵卽著酌量分撥若干名派員帶往勝保軍營協勦李德越境勦賊利在速戰並著會同統

兵各員將懷慶賊匪剋期進剿一俟該郡解圍即可折回山東辦理地方事宜將此由六百里各諭令知之○諭李嘉端奏探聞近日水陸賊情及籌辦防剿一摺水路賊船自金陵竄出沿江搶掠河南旱路之賊攻陷羅山後拆屋築壘意欲順淮東下又由仙花鎮東竄黃安逼近皖境該省水陸各要隘亟宜嚴密堵截昨據陸應穀奏潁州捻匪聚集滋事已諭令周天爵酌調徐宿一帶駐紮之官兵練勇會同該撫合力兜拏見在各路籌防著李嘉端卽與周天爵咨商抽調並督同總兵王玉山扼要布置毋令賊匪勾結爲患將此由六百里諭令知之○李嘉端奏請以已革臬司張熙字幫辦防剿從之○甲寅江西巡撫張芾奏該逆慣用地雷攻城勢甚危險得勝門未燬民房尙多該逆伏踞偷窺地道當經臣商之陳孚恩江忠源密將所派游兵練勇及分守永和順化進賢惠民

等門之楚勇約計千名並浙江擡槍兵調集該處晝夜嚴防凡遇打仗不令出隊以免墮賊奸計尤恐該逆數穴同時並發箭令帶勇各弁分段守禦不得顧此失彼正在督催趕辦間六月二十三日寅刻該逆於前次轟塌城垣缺口之西復用地雷轟塌城身四丈有餘賊眾蠭擁而至適江忠源之弟職員江忠濟巡城至得勝門與已革總兵清保首先督同楚勇將賊擊退正欲乘勝壓下右邊相連處復轟塌五丈有餘共塌九丈有餘轟傷弁勇多名江忠濟見勢危急持刀督勇向前誓不獨存甫至缺口該逆又將大火藥包向內拋擲燒傷楚勇數十名賊目手執黃旗乘勢上城江忠濟等奮力迎擊將賊目登時殺斃眾勇一齊趕上賊始敗退當搶護危急之際該逆又於舊缺口之東用地雷轟塌城身六丈有餘幸守備李輔朝等豫先布置雖西邊勢甚危急未敢稍違節制擅

離半步於黑談上騰後卽行堵住缺口該逆用大火藥包拋擲勇
目戴利行夏春潮及眾勇丁均各受傷已革遊擊長春與都司景
星衛千總張繼成督令兵勇幫同抵禦督糧道鄧仁堃等帶領練
勇躬冒矢石合力將賊殺退江忠源復馳赴救援兵勇更覺用命
適
臣甫由得勝門赴永和門中途聞警折回督飭在城文武員弁
各帶兵勇夫役搬運輒石趕緊搶築竭一日之力一律高與城齊
復令總兵馬濟美統帶兵勇自永和門外營盤出隊由東而北又
令都司戴文蘭已革副將張金甲各帶兵勇自章江門外營盤出
隊由西而北兩路夾擊以分賊勢賊眾伏匿不出從牆內放礮抗
拒我兵屢次攻撲適值大雨槍礮難施西路兵勇進攻文孝廟賊
壘賊眾突出數百人戴文蘭奮不顧身帶勇迎擊賊退入廟殺賊
二十餘名是役也該逆用地雷三處同時並發轟塌城牆共二十

五丈有餘較前尤形危險仰賴 聖主福庇得以化險爲平計前後各處斃賊二百餘名該逆計無所施非圖他竄卽遠求金陵之賊接應連日探聞下游時有賊船數隻或數十隻乘風駛上而援兵尙未併集萬一賊匪他竄我兵無船不能急追蔓延尤爲可慮應請飭催大營所派雲南官兵及湖南所派鎮筸鎮兵星速前來赴援並令迎賊夾攻以期迅速殲除 上諭軍機大臣等逆匪圍撲南昌連次用地雷轟陷城牆經該省文武合力堵禦俾得化險爲平所有轟陷城垣業已築復在事各員均屬奮勉可嘉著張芾擇其尤爲出力者隨時保奏以昭激勸將此由六百里諭知張芾並諭陳孚恩江忠源知之○調鄭敦謹爲河南布政使嚴正基爲廣東布政使○調陳啟邁爲江蘇布政使以文煜爲江甯布政使周鳴鸞爲四川按察使由陝西陝安道遷○命降調江蘇布政使倪良耀

仍畱江蘇差遣並辦理海運事宜○乙卯諭內閣怡良許乃釗奏
參捏病規避之委署知縣一摺江蘇試用知縣王慶嵩委署吳江
縣事該縣有應行籌補前任欠解海運米石係緊要款項輒敢託
病告假實屬有心規避王慶嵩著卽行革職以示懲儆江蘇爲財
賦重地如果地方官辦理得宜小民具有天良斷無不踊躍輸將
之理何至州縣視徵漕爲畏途臨委捏病總由向來浮勒過甚以
致民力凋敝追呼愈迫抗欠愈多後任無從著手病國病民莫此
爲甚江蘇如此他省可知嗣後著有漕各督撫嚴飭所屬徵收漕
米當視向辦章程力求撙節有減無增俾民知愛戴自無不感激
輸將庶正供不至有虧而官民亦不至交困其有仍前浮濫刻剥
民膏下拂輿情上虧國課者卽著嚴參懲辦勿稍姑容○丙辰諭
內閣勝保奏連日續獲勝仗見在內外夾攻一摺懷慶賊匪經大

兵節次進仗斬擒甚多初六日托明阿勝保善祿會同分路進攻逆匪分股抗拒托明阿善祿將東北正東二股賊匪擊斃二百餘名其南股賊匪甚眾勝保督率將士揮兵迎擊先用槍礮擊斃一百餘名逆匪分逃我兵乘勢掩殺復斃數百名該逆復由東北擁出直撲勝保陣前我兵俟其撲入奮勇迎勦擊殺數百名其西南一股經西安馬隊副都統雙成及黑龍江馬隊分鈔截殺槍斃百餘名中箭而逃者無數自辰至酉統計殺賊八九百名其搖旗領隊之長髮賊均被殺死逆匪圍城屢經官兵痛勦賊膽已寒無難殄滅見在恩華等各帶官兵移營前進著卽會同托明阿勝保善祿等分路夾擊迅解懷慶之圍並嚴杜賊匪竄逸之路務將逆黨殲除淨盡肅清河北以慰朕懷○勝保奏初六日臣等會督將士進攻托明阿仍攻東北善祿攻正東臣勝保攻正南直撲南門土

壘逆匪分股抵抗其東北正東二股經臣托明阿善祿等督率官兵擊斃二百餘名賊匪敗退俱繞賊營礮臺奔入土壘其南股賊匪頗眾臣勝保督率將士揮兵迎敵擊斃多名我兵已追近城濠該逆復由東北擁眾而出直奔陣前我兵俟其撲入卽奮勇迎勦該逆不能抵禦仍復敗竄統計殺賊八九百名其搖旗領隊者皆髮長尺許的係老賊均被殺死若兵力厚集各路俱能認真進勦無難迅殄逆氛又奏臣咨調防守柳園口天津兵三百名來懷以資攻勦適接准訥爾經額咨見派副都統松玉總兵德坤前任河督文沖管帶兵勇共三千名前來隨同會勦但由武陟渡河前來則可有濟於事若往丹河以北則於解圍一層仍屬隔膜此時但有得力兵勇爲後路策應由外攻入使賊匪立潰可期殄滅上諭軍機大臣等昨以恩榮董占元等紮營均在丹沁兩河之北距

賊太遠特諭令拔營前進逼近賊巢方能與懷慶城外勝保托明
阿善祿西凌阿等兵聲勢聯絡若但於河北遙爲聲援即使小有
斬獲仍不能解郡城之圍且勝保等兵力較單儻無人接應懷慶
致有疏失各路統兵大員豈能置身事外見有柳園口防河之天
津兵三百名已由勝保札調赴營文沖勸諭團練緩不濟急著訥
爾經額仍遵前旨迅卽飭令松玉德坤帶兵馳赴勝保軍營並令
由武陟渡河較爲迅速不可赴丹河以北致延時日並嚴飭董占
元移營前進不得因前次輕進失利又復觀望前有旨令將托雲
保所帶官兵畱於河北著卽撥給馬匹飭令迅赴勝保軍營聽候
調度恩華統帶重兵著卽會同托明阿勝保督飭各路將弁相機
進剿速解懷慶之圍將賊匪殲除淨盡毋令復有竄逸至嚴防河
口已有旨令該督撫暨河督安辦並嚴諭哈芬嚴防太行要隘矣

恩華托明阿勝保等軍營均與訥爾經額相距尚遠若必待往返咨報聯銜具奏轉恐稽延時日此後何人接仗卽由何人奏報如會同進兵卽聯銜具奏以慰朕念將此由六百里各諭令知之○

江西巡撫張芾奏六月二十四日賊匪自得勝門外賊營出向東南直撲永和門外總兵馬濟美營盤馬濟美帶兵堵禦正在乘勝窮追不意樹林內埋伏多賊突出抗拒我兵少卻該總兵奮力督戰手刃數賊因眾寡不敵身受矛傷登時陣亡臣卽飭遊擊祥麟點放二千斤大礮正中賊隊城外營內亦開礮接應先後擊斃賊匪無數適知縣沈衍慶同從九品胡椿陳炳龍管帶練勇由南面出隊施放連環槍礮斃賊多名干總王樹英等帶勇前來會同奮擊參將羅玉斌復督帶川勇貴勇署參將文忠帶九江鎮兵分三路夾擊總兵阿隆阿統帶鎮標各兵自進賢門前來策應該逆紛

紛敗退復飭知府耆齡派外委哈玉麟等出隊邀截斃賊頗多查
總兵馬濟美奮勇捐軀其祖與父皆係效死疆場可謂世篤忠貞
應請

天恩優卹以慰忠魂所遺九江鎮總兵員缺卽委南贛鎮

總兵阿隆阿暫行兼署

臣

察看賊勢較上次打仗人數增至三倍

之多我軍究形單薄不敷調遣請飭下湖南廣東各督撫迅撥精

兵各二千名來江助剿

上諭逆賊圍攻南昌我兵防守甚嚴復

有馬濟美戴文蘭兩軍分扼東西兩面該逆前無可乘旁有牽制

鋌而走險爲此撲營之舉其意實圖擾我營盤進占地勢見在馬

濟美旣已陣亡所帶官兵必須統領得人阿隆阿雖兼署鎮篆其

進賢永和兩門營盤能否兼顧亟須妥籌布置廣東援兵到尙需

時未可株待音德布此時想已帶兵趕到湖南兵勇已於六月十

八等日先後啟程計亦陸續可抵南昌該撫仍當會同陳孚恩江

忠源妥爲調度以戰爲守此次轉敗爲勝該撫等均能親督戰其帶勇各員分門出隊亦皆踊躍效命果能始終不懈逆匪必可殲除該撫務當激勵士氣相機進兵不可因小有挫折致形畏阻江西賊船續至後路旣無追兵湖口又無重鎮惟有於附近河干設法堵禦近城居民若能自相團練如金陵之四十八社揚州之虹橋皆可稍助官兵之力隨同馬濟美出隊之將弁何以於該總兵遇伏之時不能竭力救護是否接應不及抑係退縮落後並著該撫查明具奏將此由六百里諭知張芾並諭令陳孚恩江忠源知之○諭本日據孫瑞珍奏堵勦之策必先扼守黃河撤收船隻並將緊要渡口處處扼定南北岸船隻悉數撤收去其桅舵或牽置岸上或鑿沈水中該逆無船可獲自不能任意往來凡各該省收船之事專責沿河各州縣文武各就本境趕緊妥辦計旬日間

卽可撤收淨盡至文報往來可畱渡船數隻備用並派誠實員弁嚴密看守等語黃河爲南北天險扼守要隘必應如此辦理但恐奉行不力又有疏懈所關非細著直隸東河南河江蘇河南山東山西陝西各督撫迅飭沿河各地方文武並河道廳員弁各就本境不拘何項船隻悉數撤收不特清江孟津蘭儀等處渡口最關緊要卽偏僻港汊亦當嚴防偷越該督撫等仍遴委妥員沿河往來察看遇有玩泄員弁卽嚴參懲辦斷不可任賊匪再有搶船偷渡之事至豐北既有漫口微山昭陽等湖與運河聯爲一片河流旣廣形勢散漫防守更屬非易並著各該督撫飭屬相度地勢設法堵截前次北竄之匪係搶奪煤船渡河雖經官兵屢次焚毀未能淨盡其船見泊何處是否曾爲賊踞著長臻陸應穀迅飭查明焚毀杜賊奔竄之路儻經此次嚴諭之後仍有賊匪偷渡惟該督

撫是間懷之將此由五百里各諭令知之○諭昨因江西省城被圍日久疊經諭令張亮基等飛催帶兵各員迅速馳往會剿本日復據張芾奏稱該逆於六月二十四日率眾數千突由得勝門外向東南直撲永和門外官兵營盤雖經兵勇邀擊轉敗爲勝連日續到賊船又有數百號賊眾已逾二萬我兵十分單弱急待援兵早到方可解圍湖南距該省一水直達前調之鎮筸等鎮官兵並所募湘鄉等縣練勇著張亮基駱秉章並曾國藩於接奉此旨後迅卽飭催管帶各員星夜馳赴南昌會合剿賊萬勿遲延至誤事機將此由六百里諭知張亮基駱秉章並諭令曾國藩知之○予江西陣亡總兵官馬濟美祭葬世職○調廣東兵二千名赴江西剿賊○丁巳諭內閣給事中雷維翰奏江廣新漕部議由官折價請旨遵辦一摺前據戶部議奏江廣等省咸豐三年應徵漕糧由

官折價解京民間完納悉仍其舊不許以折銀之議向民間更改
舊章藉口浮收勒折已降旨依議行矣第恐戶部原奏閭閻未能
周知各屬州縣藉口折價愚弄小民以爲科斂地步致生事端著
湖南湖北江西各督撫按照部議剗切出示曉諭俾窮鄉僻壤皆
知此次新漕仍照舊章完納由地方官自行變價解京與民無涉
儻不肖官吏有藉詞私改章程及浮收勒折等弊卽行嚴參懲辦
並著各督撫將此旨及戶部原奏一件刊刻徧行宣示咸使聞知
將此通諭知之○諭給事中雷維翰奏請飭嚴拏私販硝礦以防
影射而杜接濟一摺私販硝礦久干例禁若如該給事中所奏官
役以採辦爲詞特有印文影射卽拏獲到官亦可藉詞狡脫甚至
沿途售賣各處土棍展轉興販接濟奸徒弊端百出關津渡口兵

定章程嚴行懲辦著直隸山東各督撫順天府尹於出產硝礦之處認真查覈嚴緝究辦並著各省督撫一體查拏毋稍徇隱該給事中所擬章程著該部覈議具奏○諭軍機大臣等向榮許乃釗奏金陵鎮江疊次接仗情形一摺金陵鎮江二城久被賊踞連日進剿雖有斬擒仍未得手且官弁兵勇多有傷亡似此師久無功城池何日能復逆匪何日能平據張芾奏賊船陸續駛往江西該處賊眾已逾二萬顯係金陵等處賊匪潛行逃竄滋擾上游該大臣等頓兵城下坐視鄰省危急於心何安著向榮等卽督飭將弁兵勇設法進攻迅圖克復若金陵得手傾其巢穴則各處逆眾自必聞風膽落前派音德布帶兵一千二百名前往何以至今尙未趕到著卽飛催兼程赴援毋稍延誤南昌被圍日久而江面賊船仍聞陸續上駛應如何設法派撥兵船扼要堵截之處著該

大臣等一併妥速籌辦將此由六百里諭令知之○予江南陣亡遊擊朱占鼈祭葬世職○戊午諭內閣吳文鎔等奏勦辦尋甸匪獲勝情形一摺滇省東川回匪滋事前經吳文鎔帶兵出省勦辦茲據奏稱該匪被勦逃至尋屬之柯肚地方勾結八甲各村寨回民恃蠻抗拒於六月初五等日經我兵圍攻殺賊數十人及百餘人首匪馬二花於十五日夜挈帶千餘人竄至尋城迤北之魯沖回寨煽惑八甲匪徒負嵎不出經吳文鎔督令署臬司崔光笏及道府等分兵進剿並飭總兵愛興阿常存兩路夾攻該匪出隊迎拒我兵槍礮齊施斃賊無算直入賊巢斬馘數百人首匪馬鵬程等亦經拏獲訊明正法見在八甲地方業已肅清等語回匪經官兵痛加勦洗該督務將餘匪悉數殲除勿留餘孽其在逃之首犯馬二花等仍著嚴拏務獲懲辦毋稍疏懈○諭給事中張秀奏

請查照料使臣不慎之文武交部嚴議一摺此次逼羅貢使道經河南突遇賊匪搶掠並有被傷情事該護送文武各員並地方官漫不經心均難辭咎著陸應穀卽行查明分別參奏○琦善等奏初四日辰刻賊由鈔關門南瀛子巷擁出數百人適于總李光觀在彼設伏卽帶領兵勇迎擊殲斃多名初六日午刻天甯門撲出賊匪數百名都司常萬清等帶兵截擊用銅礮轟斃十餘名復於草間設伏擊斃多賊餘匪遁入城內初八日黎明瓜州賊船大小數百隻上竄至三汊河總兵瞿騰龍整隊迎擊一面知會侍衛德興阿帶領馬隊於西岸嚴陣以待並派都司滿祿帶河州官兵三百餘名隨同德興阿屯紮西岸防賊鈔襲旋見賊眾四千餘名由運河東岸鼓噪而前直撲三汊河口山東官兵營盤瞿騰龍督率遊擊安勇黃志配葉榮都司毛三元守備馬連科帶領直隸山東

官兵六百名過河迎擊殺賊無數又見另股賊匪二三千人在下游揚子橋支搭浮橋渡河欲撲南門大路我兵隔河用銅礮擡礮連環轟擊賊匪浮橋難以支搭又竄至上游搭橋由桂花莊直撲鈔關門以西繞赴南門東岸期與南門賊匪聯絡瞿騰龍帶領官兵又趕赴上游支搭浮橋前往迎擊一面飛調遊擊李英魁率都司余兆青等渡河合力迎截賊眾死拒不退經李英魁余兆青從旁衝擊瞿騰龍亦率兵迎面進剿賊陣始亂紛紛潰竄別遣兵鳬水繞由儀徵河之西岸兩面夾擊賊勢不支仍悉數竄回瓜州見在城中賊勢漸窮望援甚急疊據儀徵縣探報江甯連日復有賊船數十隻及百餘隻陸續放至瓜州希圖接應福濟又奏連日察看賊情窮蹙瓜州接應之路又經三汊河官兵擊敗城中糧食將盡該逆屢在鈔關等門偷搭浮橋似有竄逸之勢初七日據參將

師長鏟稟稱本日寅刻派把總楊成章等帶領兵勇二百名在徐
凝門外埋伏黎明賊由浮橋過河約二百餘名鑭擁前來我兵突
出圍攻擊斃賊匪四五十名生擒旅帥毛老四一名賊匪因失旅
帥卽在城上吹螺復哨聚四五百名出城我兵奮勇爭先適雷以
誠鄉勇亦到擊斃過橋之匪及落水者又一百七十八名 上諭
軍機大臣等賊勢窮蹙已極雖據訊供賊欲分門竄出並據探報
連日復有賊船數十隻及百餘隻陸續放至瓜州難保不又圖報
復以爲城中救援該大臣等務當督飭將弁兵勇趁城中賊勢已
孤之時一鼓作氣剋期收復仍嚴防各路賊匪來路斷其救援攻
勦更易得手再城破之後該匪勢必拚死奔突安徽徐州清江一
帶本日已諭令周天爵奕經李嘉端等嚴密設防該大臣等仍當
一體嚴防豫爲布置無任分竄又滋蔓延將此由六百里各諭令

知之○諭本日據琦善奏攻勦揚城賊匪大獲勝仗並焚毀瓜州
賊船多隻斬殺賊目數名揚城賊匪勢已窮蹙訊據拏獲奸細供
稱有賊欲分門竄出之語該逆困守無援勢必拌死奔突他竄揚
州密邇皖省防堵最關緊要周天爵與奕經各帶官兵在宿徐一
帶扼要布置前有旨諭令周天爵派兵勦辦潁州一帶土匪不知
見在情形如何若南路賊匪又圖竄擾必須於要隘處所極力堵
勦勿任再有勾結致蹈從前覆轍李嘉端身任巡撫更屬責無旁
貸務與周天爵奕經等咨商會合堵勦呂賢基督同趙畊等辦理
本省團練諒已漸有成效卽飭諭各處鄉勇併力勦賊以爲官兵
策應將此由六百里諭知周天爵奕經李嘉端並諭令呂賢基知
之○諭吳文鎔吳振棫奏南掌國遣使敝關恭請入貢並呈進表
文一摺南掌國長召整塔提腊宮滿世守藩封情殷慶賀並例貢

屆期遣使啟關呈進貢物所有該國使臣計七月內可抵雲南省城該督等於該貢使到省後卽照例派委文武各員妥爲護送啟程於封印前抵京將此諭令知之○己未諭軍機大臣等周天爵奏請撥淮北票鹽十萬引運皖督銷一摺淮北行鹽引地自經賊匪竄擾商販裹足民間淡食自係實在情形該侍郎旣稱海州王營西霸等處堆積票鹽數十萬引無人領運著准其酌撥十萬引招商認販以濟民食該侍郎旣經籌議及此自必確有把握卽責成一手經理務使行銷暢利私販絕迹俾課項藉資接濟並籌議章程具奏至提回月課據稱可得銀十六七萬兩以此提備兵餉儘可敷用若續撥餉銀陸續解到即可將此項課銀通融協濟江北糧臺不得全數抵畱以致此贏彼絀見在揚城賊匪窮蹙思竄該侍郎駐紮處所甚爲喫緊卽潁州永城捻匪亦在勦捕緊要之

時仍著與奕經李嘉端迅籌扼勦慎勿顧此失彼又誤事機也將此由五百里諭令知之○諭御史陳慶鏞奏福建賊匪情形一摺據稱福建下游賊匪始由海澄發難所至地方文武逃遁致賊得以占踞空城其賊船攻犯廈門由官兵之素預小刀會者與爲內應同安縣知縣李湘洲有走匿情事見在同安西界多半從賊廈門爲全省精華急須選擇紳士召募馬巷義民三四十人一從劉五店徑渡五通一從同安前往官尋到處設法解散卽以紳耆爲嚮導並知會水師兵船駛入廈港賊必聞風逃回海澄各處仍令紳士勸諭使之互相疑忌自當迎刃而解其上游賊匪大都起於邵武建陽順昌崇安將樂沙縣等處其賊匪有衣和髮辮各暗號並有燒紙坐臺大小會及鐵板令草鞋令過江龍各名目其汀州之江湖會匪亦略如坐臺之會間有著名會目廖彥如充當縣役

等事其在邵武入會者與江西甯都賊眾嘯聚於長汀瑞金交界之黃竹嶺地方尤虞勾結等語至臺灣土匪前據御史蔡徵藩奏稱已有圍攻府城之語茲據該御史奏賊於五月十二日攻臺灣府城經商人等登城拒守並合民勇殺賊五六百名知府裕鐸自出家財助餉其在臺之商郊各幫與見赴天津之臺商各船均各踊躍捐餉以備軍需見在鳳山縣有遊擊曾玉明守住火藥局被賊圍困救兵莫達賊目有林許爲渠魁吳王二姓爲主謀該御史籍隸閩省所奏自係實在情形閩省以臺灣爲膏腴廈巷爲門戶延建則地據上游爲省垣之屏蔽處處皆關緊要必應及早殲除前有旨令有鳳馳往福州署理提督篆務此時如已抵閩卽著王懿德與有鳳按照該御史所奏查明各地方滋事情形應如何解散賊黨掩捕賊蹤迅速妥辦該御史又稱臺灣在籍前任禮部員

外郎鄭用錫候補主事施瓊芳候補道林國華道職林占梅均堪
辦理團練勸捐事宜著該署督等諭令該紳士等或捐貲助餉或
出力督團但使地方肅清必當優加獎勵總之以本地之捐項作
本地之軍需以本地之義勇捕本地之盜賊較之轉餉調兵事半
功倍諒該署督必能妥籌辦理也該御史前保晉江監生丁拱辰
見寓廣東著該署督咨催迅速回閩以備調遣其所刻則克錄等
書卽由該署督附摺呈進以備採擇原摺著鈔給閱看將此由六
百里諭令知之○前任江蘇布政使倪良耀奏截留海運漕糧請
歸本年新漕搭運得旨汝真是一無用之人去歲徵漕時皆係汝
遲延貽誤汝之罪將誰諉耶○庚申諭內閣勞崇光奏興安會匪
勦辦肅清一摺廣西興安縣城收復之後著名首要各犯及甘心
從逆漏網稽誅者尙復不少經該撫分派文武員弁帶領兵勇分

投馳赴各村令委員與該處紳耆相見曉以隱匿連坐之條並諭以良民被脅皆准自新之意各紳民皆知感悟立將各犯拏解計共一千五百餘名所有起意首犯黃老小王六子黃狗晚及著名要犯趙人淙雍月標鄧腥香等俱拏獲到案經臬司許祥光訊明供詞後卽行分別正法傳首梟示各首匪皆處以極刑其全州靈川灌陽兵勇團練亦陸續拏獲逸犯多名著名各要犯均已次第就俘見在地方一律肅清辦理尙屬認真所有酌畱官兵分別各城墟藉資彈壓並分派委員清查保甲勸諭紳耆實行團練各事宜均著照所議辦理該撫仍當飭屬加意搜捕務使盡絕根株勿任蔓延用副朕除暴安良之至意另片奏武宣象州武緣馬平鬱林博白北流賀縣等處均有土匪滋擾見經該撫派撥官兵練勇委員分投勦辦南邕壯練械鬪之案業經查拏解散其廣東竄擾

蒼梧之匪亦經兩省會合兜擒在逃之馬平縣逆匪韋藍氏及其子韋扶果並主使附和各犯仍著嚴拏務獲盡法懲辦以遏奸萌○諭黃宗漢奏府城猝被水災見在委員查辦一摺浙江台州市地方於六月十九等日風雨大作山水下注江湖泛溢四鄉民舍田禾均遭淹沒二十一日雨勢愈大西門城牆被水衝塌城內水深丈餘衙署倉獄幾成巨浸被水之民死傷枕藉覽奏實深憫惻該撫既已飭司委員齎銀前往煮粥散賑諒可稍資餬口著專派道府大員親往妥爲撫恤並將積水疏消以奠民居其被淹田畝應如何分別蠲緩之處卽著迅速查明據實具奏至錢塘等縣塘工因風潮激損亟須搶護情形亦著詳查迅辦務使災黎得所闔境又安以慰朕軫念民依至意○辛酉諭軍機大臣等張亮基等奏賊匪南竄楚境屢獲勝仗一摺豫省賊匪由羅山縣竄入湖北

黃安麻城一帶經該署督等派委文武兵勇水陸夾擊屢獲勝仗除臨陣擒斬外其餘股匪不過二三百人賊勢窮蹙已極勦辦尙屬迅速該署督等已飭各州縣曉諭各鄉團遇有零星賊匪竄入卽行捕獻並飭將各要路多設陷阱水路將船隻提開橋梁撤拆布置亦合機宜楚北當兵燹之餘豈堪再遭蹂躪張亮基等務當嚴飭各路帶兵文武趁此賊勢潰散四面兜剿將此股逆匪悉數殲除萬不可任其餘燼復然致滋蔓延都司善保臨陣先退著卽查明參奏其接仗出力之員弁兵勇並陣亡兵勇斬擒賊匪名目均著詳細查明具奏再前有旨令該署督等豫備船礮兵勇駛赴下游以助金陵攻剿並可截斷賊匪江面往來之路此係緊要機宜業經由部籌撥銀二十萬兩以作經費張亮基等卽飭屬迅速辦理該省無論何款先行籌撥俟部撥到時歸款毋稍遲誤將此

由六百里諭令知之○周天爵奏奉旨飭臣派撥兵勇勦除潁州
捻股遵卽檄飭官紳協力嚴拏疊接在籍員外郎孫家泰等稟稱
在潁亳一帶先後斃匪三百餘名捻首蔣柱梁東並已招復叛之
劉飛熊等業經擒獲正法各股尙未斂迹當飭孫家泰等認真緝
拏嗣據永城縣知縣王樹漢稟報捻匪滋擾臣飭前宿州知州張
清元等往剿在該縣北鄉火燒店敗捻股八百餘人斃大捻首胡
萬箱等四名又於大王集獲孟傳汰等十七名署亳州知州熊英
稟報擒斬王三鐵釵等二百十餘名生擒捻首陳申正法餘匪逃
遁據宿州紳士周全義等稟報宿蒙亳永交界處所捻首鄧六李
月等在雉河集一帶聚集千餘人肆行不法臣復飭張清元等仍
於蒙亳之間嚴加勦捕臣拜摺後卽赴潁郡統帶兵勇相機進勦
上諭呂賢基李嘉端奏賊匪分竄籌辦堵勦情形逆匪分竄肆

授由黃安麻城攻陷羅田撲入英山竄至太湖亟宜翦除淨盡著該侍郎等卽責令帶兵各員扼要堵截合力勦洗並飭各該地方官及營汛員弁等認真防守城垣巡查江面毋任匪黨闖入周天爵著卽趕緊前往潁州一帶勦捕捻匪並著李嘉端飭令地方文武協力兜拏呂賢基分飭鄉團自相保衛互爲應援總期及早廓清毋任苟結滋蔓將此由六百里各諭令知之○諭怡良許乃釗奏遵籌江南大營糧臺請以徵收關稅作爲兵餉等語見在江南大營需餉孔殷該督等所奏自係實在情形著准其以上海道徵收關稅銀兩作爲大營及鎮江各營兵餉之用除滸墅關所收稅銀及催繳捐項外並准其行咨浙省藩關運各庫如有可以協濟之處務令源源接濟毋誤要需至於地丁徵銀爲國家惟正之供江蘇本年上忙錢糧雖經緩至秋後徵收轉瞬卽屆秋成開徵不

遠著卽飭令該州縣嚴禁向來浮濫之習以順輿情若能踊躍輸
將較之關稅徵銀奚啻數倍當此軍需孔亟之時該督撫等具有
天良必當設法曉諭並密加訪察如有奸胥墨吏圖飽私橐以致
刁民藉口有誤徵收者卽將辦理不善之員嚴行參處以重帑項
而濟軍需將此由六百里諭令知之○署湖廣總督張亮基等奏
查明河南等處賊情並請飭行間文武各上平賊方略得旨所見
甚是見踞三城之賊未見有減於前而各處分竄幾於策應不及
不知已後之局若何惟有懇祈天鑒速赦民劫而已掩敗爲勝
軍營通病每獲小勝極力鋪張不知勝報到來朕必降旨獨不慮
及爲賊所笑耶汝等旣出此言必應事事從實也○予江南陣亡
提督福珠洪阿祭葬世職謚壯敏○壬戌諭內閣訥爾經額托明
阿勝保奏績獲勝仗一摺懷慶城外賊匪負嵎抗拒本月十三日

經托明阿善祿勝保分三路進攻齊撲賊壘先有巡哨賊匪數百人直奔東南抗拒托明阿善祿督兵分投迎擊槍斃百餘人該逆復由東面擁出數百人我兵四路衝擊殺賊一百數十名維時勝保分兵於各賊壘放火喊殺阻其救援一面用土草墳壓濠溝揮兵直入賊壘殺斃逆匪二百數十名多係長髮賊目賊遂大潰此次進攻托明阿善祿分路勦擊勝保復揮兵深入奮勇可嘉見在訥爾經額已抵清化鎮副都統松玉前任總兵德坤及遊擊吳璋所帶各路官兵均可趕到托明阿等軍營著該大臣督率各路大兵四面圍剿埽蕩賊氛迅解懷慶之圍毋稍延緩○諭軍機大臣等訥爾經額等奏續獲勝仗一摺逆匪於懷慶城外深溝高壘負嵎抗拒托明阿勝保接府縣密稟知城中糧米漸匱卽定日期攜帶米糧百石督兵分路進攻直入土壘殲斃長髮老賊數百名去

南城門不及一箭之遙乃以勝保後路無重兵接應不能深入以致功虧一簣殊爲可惜懷郡一城關繫河北全局豈經降旨令該大臣迅往督率各路官兵合力剿賊速解城圍見在城中米糧已匱若再不迅圖解圍則城內人民勢漸不支難保不別滋他變該大臣見已前往清化先派松玉德坤帶兵五百名馳赴托明阿勝保軍營並令遊擊吳璋速帶天津兵三百名趕赴勝保行營助剿懷慶被圍危急正當攻剿喫緊之際托明阿等兵力較單僅派兵八百名前往協濟仍恐未能敷用著該大臣再行添派弁兵迅速前往以資調遣再陝安鎮總兵郝光甲帶兵二千由澤州馳赴懷慶此時諒已趕到卽著該大臣飛飭前赴托明阿善祿軍營聽候調遣勿令株守遠處無濟實用逆匪屢被懲創勢已窮蹙見當各路官兵雲集著卽約期會剿迅解城圍萬不可再有延緩致誤事

機將此由六百里各諭令知之○癸亥諭軍機大臣等文謙奏天津地方緊要請派大員暫行駐守一摺天津爲水陸衝要拱衛京畿所有稽查奸宄彈壓地方均關緊要見在海運漕糧將次兌竣孫瑞珍於驗收完竣後卽著回京慶祺著留於天津專辦巡防事宜其見駐天津之盛京官兵卽歸慶祺調度文謙雖無地方之責見當辦理巡防之際著該鹽政會同天津鎮道督率地方文武一體認真查察毋稍疏懈至勸諭捐輸軍餉事宜仍責成文謙會同地方官紳妥爲籌辦將此諭知孫瑞珍慶祺並傳諭文謙知之○甲子諭內閣自軍興以來東南各省紳民練勇人等或協同官兵勦捕或自行保衛鄉閭均能深明大義前有旨諭各督撫凡在籍團練出力與效命行間同其賞賚其有殺賊捐軀者自應優加獎卹以慰忠魂而昭激勸茲據御史黃經奏上年廣東股匪何名科

等擾及茂名之新垌經電白縣在籍候選知縣李景新親帶鄉勇子弟悉力捍禦殺賊數十人鄉勇及子弟陣亡者亦十餘人該員旋以眾寡不敵被害等語李景新奮勇捐軀豈宜久任湮沒該督撫迅飭查明該員死事情節奏明請卹此外被賊滋擾各地方如有紳士團練殺賊遇害者並著統兵大員及各督撫查明具奏候旨加恩○諭軍機大臣等昨因恭親王奕訢奏聞唐縣地方有匪徒肆擾當降旨令桂良迅卽查明嚴飭捕獲茲據該尙書奏此案賊匪因景州捕役拏獲捻首該匪等挾嫌起釁於七月初六日竄至唐縣地方已派員帶兵緝拏見據清苑等州縣報獲夥犯等語唐縣近接省垣該匪等膽敢挾嫌逞殺虜搶滋事已屬皆不畏法且竄越祁州定州沿途嘯聚至百十餘人之多何得照尋常盜案辦理見僅據各州縣報獲夥犯七名而於首犯仍未拏獲地方官

諱盜釀患希圖消弭實堪痛恨此股匪徒見往何處豈可任其遠
颺糾結擾害閭閻著桂良卽飭帶兵員弁會同該地方官迅速掩
捕毋令一名漏網儻該地方官不能按除淨盡卽著從嚴參辦如
所撥官兵不敷勦捕卽著酌量添調總期悉數殲除不留餘孽將
此由四百里諭令知之○戶部奏推廣鈔法以錢準銀凡地丁雜
稅及一切解部之款均請以錢鈔二千抵銀一兩從之○以司徒
照爲四川按察使由山東鹽運使遞○賞江甯殉節將軍祥厚子乾清門
二等侍衛恩全一等輕車都尉世職○乙丑諭內閣訥爾經額恩
華奏官兵續獲勝仗一摺據稱十五日恩華同托雲保蘊秀等督
率馬步隊官兵至丹河排隊先令吉林馬隊過河見西南一帶有
賊百餘名搖旗隱伏樹林內馬隊直趨向前追至大柵濠溝外槍
斃賊匪過半步隊隨亦過河施放炸礮火箭大礮擊倒望樓一座

轟斃賊匪無數本日又據哈芬奏陝安鎮總兵郝光甲於十五日
帶兵由東路丹河抵水北關繞向西北進攻山東巡撫李德由北
面進攻與恩華三面會合該鎮直抵木柵開放連環槍礮並施放
火箭將該逆望臺燒毀太原鎮總兵烏勒欣泰亦同進兵接仗各
等語該大臣見已行抵修武著卽趕緊前進駐紮清化督飭各路
官兵剋期進攻將丹沁二河賊匪迅速掃除早解懷慶之圍以慰
朕念○諭王懿德奏勦辦閩省上下游兩處賊匪獲勝情形一摺
據稱六月初八日尤溪縣被賊竄擾署知縣金琳力戰受傷投水
遇救商同卸署知縣蕭作霖密圖收復十四日適先經延建邵道
胡應泰派委帶兵策應之署都司顧飛熊等兵抵該處與賊接仗
斃賊二百餘名逆首林俊踞七口橋抗拒官兵該縣金琳等帶勇
前來會剿賊鋒大挫林俊被槍倒地賊眾擁去生擒僞將軍蕭虎

及僞軍師僧人阿金二名殺斃賊匪並奪獲槍械無算餘賊竄至黃新口地方復被帶兵接應之署參將李煌等殲斃數百名縣城當卽收復金琳旋因傷殞命其妻女家屬均各罵賊遇害逆首林俊竄伏二十四都一帶見仍派員搜捕至下游各匪前經飭令署總兵懷塔布商同已革提督李廷鈺副將呂大陸協同剿賊六月十二日該匪攻撲金門水師提督施得高帶兵救護適陸路員弁將匪擊退該匪由水路直犯師船施得高會同護金門鎮孫鼎鼇並鹽法道瑞璣護興泉永道來錫蕃等所雇勇船堵截轟沈賊船八隻奪獲三隻殺賊三百餘名生擒七十九名並獲賊目林沙林桂二名起獲礮械藥彈多件此次上下游兩路剿辦業已得手卽著王懿德督飭帶兵文武實力進剿悉數殲除勿稍延緩傷亡之署尤溪縣知縣金琳著照例賜卹該員家屬著查明旌表以昭激

勸○江西巡撫張芾奏江省自六月下旬以來雨多晴少攻期頗難得力六月二十九日得勝門迫西城根有賊偷窺並有賊數百名乘勢攻撲江忠濟督勇擊退斃賊數十名初一日天晴臣張芾陳孚恩江忠源商令總兵阿隆阿統領兩鎮各營官兵由永和門營盤分三路進攻賊營已革臬司徐思莊所募各勇在後接應糧道鄧仁望知府林福祥所募之勇由空心礮臺出隊各勇奮力迎剿賊眾卻而復前知縣馬永熾督率眾勇向前擊退廣勇川勇貴勇從東北兩路合擊殺賊數十名將賊營外房屋二十餘間全行燒毀臣復商同江忠源派令辰州撫州兵鍾祥勇由章江門出隊進攻楚勇縋城接應賊眾拌死迎拒兵勇亦奮力殺賊統計先後各處斃賊百數十名見在專候援兵會勦乃湖南派兵勇三千數百名並向榮所派雲南總兵音德布帶兵一千二百名因雨水阻

滯均尙未到連日接據安徽臬司張印塘並彭澤湖口等縣來稟
均稱有賊船五六百隻乘風駛上當遣人向前迎探果於二十八
九等日到省停泊旋卽開赴上游此時省城未能分兵前往已飭
湖南未到之兵勇迎頭勦擊並令各府縣地方文武設法守禦以
杜滋蔓 上諭軍機大臣等此次各路兵勇復斃賊百數十名賊
之兇鋒已挫謫計已窮惟湖南所派兵勇三千六百名並向榮所
派音德布帶兵一千二百名何以至今尙未趕到著該撫卽行飛
催前進一俟援兵到齊務卽約會內外夾擊以爲一鼓蕩平之計
至續來賊船五六百隻到省停泊旋卽開赴上游究竟見往何處
該撫已飭湖南未到各兵勇迎頭截擊並令地方文武設法守禦
務當嚴飭各府縣隨時偵探賊蹤相機防勦堵其分竄之路其泰
和縣匪徒擁入縣城焚署劫獄業經該撫飛飭周玉衡募勇馳往

勦辦並飭帶勇來省之吉安府知府王本梧折回會勦著卽嚴飭
上緊兜拏無任與逆匪勾結爲患致滋蔓延至該縣匪徒因何滋
事署泰和縣知縣郭椿齡是否受傷並該處文武員弁下落均著
查明據實具奏將此由六百里諭知張芾並諭令陳孚恩江忠源
知之○于福建殉節知縣李文照等祭葬世職○戊辰諭內閣王
懿德奏請添設鑄座兼鑄大錢一摺見在京師戶工兩局添鑄當
十大錢與制錢搭放行用甚爲便利業據戶部奏明通行各直省
照式增鑄大錢酌擬章程試辦茲據王懿德奏請於福建寶福局
添設兩鑪試鑄當十當五十當百大錢其原設鑄座仍按卯鼓鑄
制錢與大錢相輔而行並將大錢式樣進呈著卽照所議辦理其
銅斤分數如何配製各省收放款項如何通行利用之處著戶部
妥議章程具奏○己巳諭內閣本日召見惇郡王奕誼遲誤未到

旋據該王進內告奏事總管太監陳鶴轉奏因昨日偶感微疾今日擬不進內適聞召見故此趕緊進來試問該王已遞膳牌本人並不到有是理乎即使有故不克進內亦應不遞膳牌乃如此怠慢已失敬謹之意迨趕來猶復託詞轉奏更屬非是設本日朕不召見更可不必進來朕雖不知該王在書房與否自問於心安乎否乎惇郡王奕誼著交宗人府議處經朕此次訓飭嗣後務須謹勉在公勿得仍若是之率忽也○庚午諭軍機大臣等向榮奏遵查賊船上駛及見在籌辦情形並請畱調糧員各摺片逆匪占踞金陵已經半載有餘朕日夜盼望捷音乃該大臣屢次奏報總以未能得手爲詞且該大臣亦明知帑項萬分竭蹶似此遷延日復一日何以支持見在南門賊匪拒守甚堅該大臣擬先於龍脖子朝陽門一路進攻使賊全力復趨東面然後進攻雨花臺即可由

南面而西自係相機布置著卽督飭將弁兵勇奮力前進以期一鼓登城萬不可再有遲延鎮江賊匪爲金陵外援若能設法先克鎮江翦除羽翼則金陵賊勢自孤攻勦更易得手該大臣等務當嚴飭和春督兵進取無再延誤前據葉名琛等奏先後雇備紅單船三四十隻於五六兩月間行此項船隻計可陸續趕到卽著於江面擇要調撥相機勦截遏賊來往之路並可與艇船合力夾擊熊毅總理大營糧臺旣資得力卽著咨明張芾仍畱江南無庸回任至直隸見辦巡防隨在需人該大臣請以同知黃德坊知州陸爲隸赴營差遣之處著毋庸發往將此由六百里諭令知之○釋已革湖南提督余萬清發往江南軍營戴罪效力○辛未諭軍機大臣等琦善等奏會攻揚城並浦口儀徵接仗獲勝情形一摺七月十一日至十九日揚城賊匪屢次出城均經官兵卽時擊退斃

城多名並獲賊目遣赴金陵求救之賊匪李二等犯可見該逆困守孤城望援甚切正當乘其窮蹙竭力圍攻三汊河既有重兵駐守瓜州之賊無從與城內接應江甯儀徵各口岸又經疊獲木簰斬擒多犯是各路外援無從闖入該逆食盡計窮每圖奔突著該大臣卽遵歷奉諭旨會督諸軍迅籌克復務須嚴杜接濟解散脅從該匪所搭浮橋悉數撤毀肅清河面毋令一船溷入致奸細暗受雇募爲之勾結夥黨潛通消息庶勦辦更易得手城內賊目尤須密籌內應設法偵擒不可令其竄逸爲要將此由六百里各諭令知之○周天爵奏潁郡捻匪最多者無如亳蒙及阜陽之西南鄉情形各不相同阜陽之西南捻匪與蠹役合而爲一其匪首多係大族平時恃役護庇捕之極難東北情形大窩大盜爲多王市集王老人集等處俱與蒙亳之白龍王廟雉河集宿州之龍山湖

等鎮集捻匪聯絡聲勢非帶重兵則處處拒捕統重兵而操切太急則又激成事變卽如本年春間臣收撫永蒙之張鳳山等其黨與已數十股揭竿而起欲攻徐州若非權宜駕馭恐此數州縣蹂躪已屬不堪而言者吹毛求疵以爲始不詳擇繼不約束終則遣散不收軍器或反誣之以從長髮俾任事之人必敗事而後已夫事非已迫急何肯率用此輩原以此輩膽大耐戰非良懦所能爲也嗣於懷遠打仗逆匪敗後衣物滿地帶兵官弁豈能令行禁止使之道不拾遺而忘之者倡言臣勇肆行擄掠及臣到徐州惟畱張鳳山其餘一概遣散收撤軍械僅少四十餘件並無不收軍器情事臣前在宿州聞賊由浦口突竄臨淮毫無閒阻卽函致撫臣陸應穀屬其固守歸德牽制數日俟臣帶兵趕到必可夾擊殲除詎料逆賊一到歸德旋失臣倍道追至永城深恐徐宿空虛續有

賊竄不敢遠追遂回徐郡是臣追賊不及並非畏死不前也而人又以爲貽誤事機臣衰憲昏耄將來恐獲罪更多仰懇天恩將臣斥退另授能者勿使庸人戀棧至潁屬捻匪臣先派前宿州知州張清元等統帶兵勇八百五十名分路進剿並將渦河以北各捻首名目訪查明確實力按拏又奏臣由固鎮起程七月十七日抵臨淮據探揚城髮逆困極思竄皖疆是其要道固鎮則偏近洪湖南北衝衢實爲徐宿門戶扼守最關緊要是以仍回固鎮以防竄賊上諭周天爵奏帶兵復回固鎮詳陳捻匪情形並自請斥退一摺前以揚城逆匪窮蹙有分門竄出之語皖城防堵緊要特諭令周天爵等扼要嚴防茲據奏稱由臨渙復回固鎮扼守水陸要隘惟以募勇又復遣散致招物議輒自請斥退殊所不解爲大臣者果能殫竭血誠有益國事卽生死亦所不計悠悠之口何足

介懷該侍郎居心行事朕所素知且年雖老而氣不衰儘可爲國家宣力著仍遵前旨奮勇圖功無庸請退亦無須曉曉置辦也本日據呂賈基李嘉端秦賊匪水陸並援運漕突有賊船肆掠並揚言攻撲廬鄉英山太湖亦被竄擾等語是防禦十分喫緊該侍郎片稱先將陝安鎮恆興所帶之兵五百名交李嘉端調度著卽飭令星速前進無稍延緩固鎮爲徐宿門戶該侍郎旣扼要嚴防務卽妥爲布置毋令南路奸匪乘間竄入至所陳捻匪情形固不可操之太蹙亦豈可聽其蔓延所有潁屬蒙亳等處捻匪著卽設法次第拏獲其單開皖豫交界處所各捻首名目旣有姓名住址可查著卽密飭兵勇跟蹤躡緝並知會河南巡撫派撥官兵會同勦捕擒獲逆首餘黨自可聞風解散務使江岸逆匪不至北竄而土匪亦漸就肅清方爲不負委任勉之慎之將此由六百里諭令知

之

江西巡撫張芾奏

本月初六日有賊四五百人突來京家山

沿河放槍當經鎮勇等奮力迎擊殲斃數十人賊眾敗竄上船

臣

遂令各兵勇於初十日出隊分路進攻該匪仍負嵎不出但於牆

孔施放槍礮廣勇鎮勇等繞至東北七里街該逆約出數百人經

廣勇等擊斃數十人焚毀賊踞之屋數十間而還先是賊船數百

隻分竄上游臣等札飭湖南管帶兵勇候補道夏廷樾等從上游

迎頭截擊並令各地方文武員弁嚴密防堵江忠源旋接伊弟候

補訓導江忠淑函稱帶勇一千名自瀏陽縣取道前來舟次瑞州

府之光義市地方卒遇賊船百餘隻當用擡槍迎擊賊即退回

臣等旋探得瑞州府城於初二日被賊竄入豐城縣城早被水淹賊

到卽焚城外廟宇並掠糧數船各該地方文武員弁是否避匿抑

因兵單未能固守有無殉難情事應俟查明分別辦理十三日總

兵音德布帶兵一千二百名到省計湖南兵勇數日內亦可到齊
援兵俱至卽當設法進剿不敢延誤至上游被賊竄擾臣未能先
事豫防咎有應得請旨從重治罪 上諭所奏京家山七里街等

處獲勝不過小有斬獲城圍尙未能解而分股之賊肆行上竄忽
又折回下駛往來自如並未經我兵剿擊卽江忠淑在瑞州斃賊
十數名亦未大勝以該撫見奏情形而論似省城可保無虞而江
面毫無把握若不迅將省垣盤踞之賊剿盡則下竄之賊勢難分
兵追擊必致任其蔓延見在江西所撥官兵及湖南兵勇陸續趕
到當可一鼓殲除不至曠日持久仍令逆匪猖獗也所有各兵勇
應如何分撥留守追剿之處著與陳孚恩江忠源等通籌全局布
置妥辦陳孚恩捐錢備賞以爲民倡著與另片所奏黃立誠等一
併交該撫存記事竣彙奏請旨派辦團練之前任內閣侍讀學士

吳光業患病未痊不能遠行准其專辦本縣團練伊姪前任編修
吳嘉賓並准其隨同辦理所保之前任河南道員劉澐候選道揭
奏光均著幫同辦理本省團練事宜福建延平會匪見據該省奏
報勦辦獲勝永安沙縣均已收復江西省城勦捕喫緊自不能分
兵遠戍建昌卽著飭令該府文武會同紳士嚴密防堵勿稍疏懈
將此由六百里諭知張芾並諭陳孚恩江忠源知之○壬申諭內
閣自軍興以來需餉浩繁特發帑金數千萬兩以冀爲民除害今
逆賊困踞江城已極窮蹙河北之賊旦夕亦可翦除惟軍需各款
不能不寬爲籌備疊經降旨諭令山西陝西四川廣東等省督撫
申諭勸捐以資接濟並特頒恩旨加廣中額學額以昭激勸通行
各省諒已周知本日據僧格林沁奏請派山西四川廣東陝西京
員回籍勸捐該郡王自係因需餉孔殷亟籌集事起見朕思各該

省大吏身任封疆值此軍需緊要之時自無不督率所屬盡心籌
辦卽如各省在籍大小官紳或經特旨簡派或由京員保奏奉旨
書辦捐輸團練事宜該員等桑梓情聯悃忱其抒亦必能協同地
方官剏切勸諭踊躍輸將以申敵愾同仇之志前此山陝等省捐
貲備餉不下數百萬兩卽被兵省分素稱瘠苦之區亦多竭誠報
效可見急公好義人有同情經理得人易收成效正不必再派京
員紛紛四出致令各省官紳轉生觀望著申諭山西陝西四川廣
東各省督撫飭地方官及在籍紳士廣宣德意徧示鄉閭俾知捐
助軍餉卽與效力行間無異所捐之款一有成數卽行奏明候朕
優加獎勵各該督撫卽宣諭官紳士民同心合力以濟軍需從此
掃蕩賊氛綏靖疆圉朕實有厚望焉此旨並著通諭各省督撫知
之○諭軍機大臣等昨以懷郡被圍已久據奏報攻勦情形殊深

焦切諭令訥爾經額等迅速合力兜圍茲據該大臣會同恩華托
明阿勝保具奏剿賊獲勝各摺又據勝保奏稱該匪受創窮蹙見
已移營進剿並嚴斷接濟添派精兵以防西竄等語此時賊眾堅
匿不出郡城尙未解圍必應四面攻擊使賊首尾不能兼顧方可
聚而殲旃訥爾經額見已駐紮清化鎮恩華等即可渡河合剿茲
醜類無難一鼓殲除該大臣等惟當慎遵疊次批諭併力環攻
毋誤事機其西路七里屯小官路等處仍應迅速派兵防守嚴斷
奸匪接濟並可杜賊西竄之路至城中糧道亦須設法籌運見在
大兵雲集該大臣等諒必能協力同心迅解城圍朕日盼捷音之
至也將此由六百里各諭令知之○河南巡撫陸應穀奏據署夏
邑縣知縣徐本立稟七月初八日有大夥捻匪千八百餘人竄撲
縣城該縣帶兵擒捕殲斃捻首四名夥黨四十餘人礮斃三百七

十八名生擒三十九名餘匪逃散又陳州府知府朱師濂稟十四
日捻匪劉疙瘩等嘯聚千餘人竄入沈邱劉莊店該縣會營帶兵
追捕該匪恃眾抗拒攻撲縣城鎮臣經文岱亦令署副將春明等
馳往會勦又固始縣知縣朱士廉稟息縣捻匪任二皮等糾匪入
鄉搶掠勢將撲城各等語查沈邱最爲喫緊經文岱已派兵前往
應卽責成辦理先將沈邱捻匪埽除再赴項城勦捕一面咨會柏
山帶兵往固始堵勦其正陽捻匪勢已窮蹙派參將伊里綱阿會
同該地方官認真按捕桐柏餘匪責成知府顧嘉衡緝拏務絕根
株惟歸德爲東路門戶見在捻匪四起勢甚狼狽臣回省後本擬
察看情形何處喫緊卽帶兵前往勦辦而豫省各營除分防外省
城存兵不滿二千斷難再調函咨舒興阿調兵一千見准覆稱彼
處存兵無多不能分撥臣由汝甯帶回鄉勇僅二百數十名欲續

行招募又苦經費不敷以致到省旬餘未能前進得旨所奏自係
實情然歸德一敗大損軍威汝若再弗振奮何以全朕用人之顏
面以封疆大吏僕僕在道罔所措手獨不慮及通省官民笑汝乎
○是月緩徵山東臨清等十一州縣衛風雹各災兩浙橫浦等六
場被擾竈戶新舊額賦